

SENI DAN SENSASI

Populariti Menewaskan Kualiti

Oleh: Yuna Nazwa

Nilai seni tidak seharusnya dikorbankan demi populariti semata-mata



“Lagu ini menarik, ia sedang viral di TikTok.”

Namun persoalannya, di sebalik populariti tersebut, di manakah letaknya kualiti sesebuah karya muzik?

Itulah ungkapan yang sering kita dengar daripada generasi muda masa kini. Lagu yang baru dimainkan beberapa saat di latar belakang video aplikasi TikTok sudah cukup untuk mendapat tempat dalam hati ramai di kalangan kita, walaupun pendengar tidak mengetahui siapa penyanyinya, maksud keseluruhan lirik, mahupun mesej di sebalik lagu tersebut. Apa yang penting adalah lagu itu mudah didengar dan sesuai untuk dijadikan kandungan media sosial.



Selebriti di TikTok Awards Event Malaysia 2024



Pempengaruh TikTok di TikTok Awards Event Malaysia 2024

Kita kini berada dalam era media sosial yang amat menekankan aspek sensasi. Fenomena ini semakin ketara dalam dunia muzik, apabila lagu tidak lagi dinilai berdasarkan keindahan lirik atau susunan muzik yang kompleks. Cukup sekadar terdapat satu bait lagu yang mudah diingati, irama yang menarik perhatian, dan rentak yang sesuai untuk digunakan dalam video berdurasi 15 saat. Selebihnya diserahkan kepada kuasa algoritma.

TikTok dan Muzik : Revolusi atau Krisis?

Aplikasi TikTok telah merombak landskap industri muzik global, termasuk di Malaysia. Dengan kebolehan untuk menjadikan sesiapa sahaja pencipta kandungan, TikTok telah membuka ruang baharu kepada artis baharu dan lama untuk mempromosikan karya mereka.

Namun, dalam keterbukaan itu juga timbul persoalan tentang keseimbangan antara seni dan strategi. Artis-artis kini berlumba-lumba untuk menghasilkan lagu yang 'mesra TikTok' iaitu mempunyai permulaan lagu yang menarik, korus yang kuat, dan durasi yang bersesuaian untuk diulang beberapa kali.

Dalam banyak kes, lagu seperti ini bukan lagi ciptaan seni yang tulen, tetapi strategi pemasaran yang disesuaikan dengan kehendak platform. Perhatian diberikan kepada kebolehan sesebuah lagu untuk dijadikan bahan latar video, bukan

kepada kekuatan keseluruhannya. Lagu seperti "abcdefu" oleh GAYLE dan "Cupid" oleh FIFTY FIFTY menjadi tular bukan disebabkan kekuatan keseluruhan lagu tersebut, tetapi kerana bahagian korusnya digunakan secara meluas di TikTok dan mudah dijadikan bahan kreatif di seluruh platform media sosial. Lagu seperti ini sering mencipta detik sementara, namun jarang kekal lama dalam carta muzik atau dalam ingatan pendengar.

Mereka menjadi 'fenomena segera' cepat naik, cepat juga hilang.

Di Malaysia pula, lagu "Satu Malam Di Termasek" oleh Joe Flizzow mendapat sambutan hanya selepas digunakan secara meluas di TikTok.

Namun, berapa ramai pendengar yang benar-benar memahami maksud di sebalik lagu tersebut secara menyeluruh?

Lagu kini yang menjadi produk 'viral' bukan lagi karya seni yang mendalam dan berjiwa.



Joe Flizzow, rapper Malaysia



Trend muzik
TikTok melahirkan
budaya “snack music”?



Pempengaruh TikTok di TikTok Awards Event Malaysia 2024

Muzik yang Cepat Diterima, Cepat Dilupakan

Trend muzik TikTok telah melahirkan budaya “snack music” iaitu lagu yang mudah diterima dan sedap didengar untuk sementara waktu, tetapi tidak meninggalkan kesan jangka panjang. Ia seperti snek: memberi kepuasan segera, tetapi tidak mengenyangkan. Pendengar jarang menyelami lirik atau menghargai keseluruhan lagu. Setelah lagu tersebut tidak lagi tular, ia terus dilupakan dan digantikan dengan trend baharu yang lebih segar serta sesuai dengan kehendak semasa.



Agy, Pempengaruh TikTok

Mereka dianggap tidak “viral”, walaupun kandungan mereka jauh lebih bermakna dan bernilai dari segi mesej serta emosi.

Seni muzik bukan sekadar mengenai bunyi semata-mata. Ia adalah gabungan emosi, penceritaan, identiti, dan keikhlasan yang lahir daripada pengalaman serta pemikiran pencipta. Namun, dalam persaingan mengejar tontonan, pengikut, dan tanda suka, ramai artis terpaksa mengorbankan nilai ini. Mereka ditekan untuk menghasilkan lagu yang sesuai dengan trend semasa, bukan semestinya selari dengan identiti atau jiwa seni mereka sendiri.

Lebih membimbangkan, terdapat pandangan yang semakin tersebar bahawa muzik yang terlalu ‘berat’ atau serius tidak sesuai untuk pendengar masa kini seolah-olah muzik tidak lagi boleh menjadi ruang refleksi atau wacana sosial. Muzik kini perlu ringan, mudah difahami, dan sesuai dijadikan latar tarian. Dalam jangka panjang, ini boleh membawa kepada ketandusan kandungan muzik yang mencabar minda dan membentuk jiwa. Artis-artis baharu, terutamanya dalam

kalangan penyanyi indie atau pencipta moden yang membawa tema sosial, kemanusiaan, dan kebudayaan, sering kali tenggelam. Karya mereka tidak diberi ruang yang mencukupi di media arus perdana atau tidak mendapat perhatian sewajarnya kerana tidak memenuhi kriteria algoritma TikTok.

Situasi ini mengakibatkan penurunan dalam kualiti penghasilan muzik. Syarikat rakaman dan penggiat industri lebih mementingkan potensi “viral” dan jumlah tontonan berbanding mutu sesebuah karya. Lagu dihasilkan bukan lagi untuk mencipta pengalaman mendalam atau menyampaikan mesej bermakna, tetapi semata-mata untuk ‘menjadi tular’. Ini menghasilkan satu ekosistem di mana artis yang mempunyai nilai seni tinggi sukar untuk menonjol, kecuali mereka sanggup menyesuaikan diri dengan kehendak algoritma.

Di Mana Nilai Seni?

Muzik seharusnya menjadi cerminan jiwa dan nilai masyarakat. Ia mencerminkan apa yang kita rasa, fikir, dan impikan. Jika muzik hari ini semakin kosong, mungkin kerana kita sendiri tidak lagi mencari makna dalam sesebuah karya seni. Kita mendengar kerana ingin mengikut trend, bukan kerana ingin memahami atau menghayati. Kita menyokong lagu kerana ia disukai ramai, bukan kerana ia memberikan impak emosi atau intelektual kepada kita.

Persoalannya, adakah kita benar-benar menghargai muzik, atau sekadar menjadi pengguna pasif kepada kehendak algoritma?

Dalam dunia di mana perhatian adalah mata wang utama, hanya kandungan yang mencuri perhatian akan terus hidup. Tetapi, adakah itu cukup untuk membina legasi seni yang kukuh dan berkualiti?

Nilai seni tidak seharusnya dikorbankan demi populariti semata-mata. Dalam jangka panjang, hanya karya yang jujur dan berkualiti akan kekal relevan. Populariti bersifat sementara, tetapi seni yang lahir daripada kejujuran dan nilai akan terus hidup dalam sejarah budaya sesebuah masyarakat. Kita memerlukan lebih banyak ruang untuk mendengar bukan sekadar dengan telinga, tetapi juga dengan hati dan akal.



Sokongan Seni Muzik



Dolla, kumpulan gadis pop Malaysia

Karya Muzik

Di tengah aliran trend yang kian mencurah deras, tanggungjawab kita tidak seharusnya terhenti pada menikmati hiburan semata-mata. Masyarakat perlu dididik untuk menilai karya muzik sebagai satu bentuk seni yang menuntut penghargaan lebih mendalam bukan sekadar berdasarkan angka tontonan atau populariti sesaat. Melalui pendedahan terhadap konteks sejarah sesebuah lagu, latar belakang penciptaannya, dan nilai-nilai yang diangkat, pendengar akan lebih memahami mengapa kualiti harus diutamakan.

Pembangun Algoritma

Platform digital seperti TikTok mempunyai kuasa besar dalam menentukan rentak industri muzik. Justeru, pihak pengurusan platform dan pembangun algoritma wajar mengambil inisiatif untuk menyeimbangkan antara kandungan yang tular dengan karya yang membawa nilai artistik serta mesej bermakna. Mungkin boleh diwujudkan ruang khas atau tanda pengiktirafan untuk lagu yang menepati kriteria kualiti sekaligus mendorong pencipta kandungan untuk terus menghasilkan muzik yang berisi dan bermakna.

Generasi Tiktok



Haqiem Rusli, Penyanyi Malaysia

Bagi generasi muda, golongan yang paling cepat terdedah kepada setiap trend baharu sikap kritikal harus dipupuk. Janganlah mudah terikut-ikut dengan apa yang tular semata-mata. Tanyalah diri: “Apakah lagu ini memberi kesan emosi atau intelektual kepada saya? Apakah mesej yang cuba disampaikan?” Dengan bertanya soalan-soalan ini, kita melatih diri menjadi pendengar yang bijak, bukan



Bella Astillah, Penyanyi Malaysia

hanya penonton pasif kepada deretan klip pendek. Akhir sekali, marilah kita bersama-sama menyokong artis-artis yang berani membawa identiti, cerita, dan mesej sebenar. Sokongan kita melalui pembelian lagu, kehadiran ke acara seni, atau sekadar perkongsian bermakna di media sosial mampu mengangkat karya berkualiti ke pentas yang lebih luas. Dengan cara ini, kita bukan sahaja membantu



Hael Husaini, Penyanyi Malaysia

memelihara nilai seni, tetapi juga memastikan industri muzik terus berkembang secara seimbang, antara sensasi dan kualiti. Dalam dunia yang semakin bising, biarlah hanya suara yang tulus, bernilai, dan bermakna yang terus berdentum di hati pendengar. Kerana seni yang berkualiti bukan sekadar hiburan tetapi ia adalah warisan dan jati diri kita.



TikTok Awards
November 2021